Jn dieser guten sach wir nichts desideriren/ Als daß Ewr^h Gunst dazu Jhr vns gebt in gebühren. Mit solcher Hülf an vns nichts gewint die gantze Welt/ Schön vnd Trew Lob bleibt Euch/ Vns der Sieg vnd das Feld.

> Venus, Zu der Durchleuchtigsten Churfürstin.

DA vor den andern all/ Jch/ als die schönste Dahm/
Das gülden äpffelein vom Paride bekam/
Pallas, erbittert sehr/ hub an mit diesen Worten:
Venus, Du darfst drumb nicht aufblasen dich so sehr: [35]
Ein schöne Princessin/ geborn an ferren orten/
Wird kommen einst/ die mehr/ als Du/ verdient solch Ehr.

O Fürstin Tugendreich/ die zeit ist vor der Thür/
Die die weiße Pallas hat propheceyet mir/
Das deine Schön die mein vnd all solt überwinden.

Was ich nie hett geglaubt/ daß sih ich jetz/ vnd denck/
Das über mein gestalt ein schöner sich solt finden.
Den gülden Apffel drumb ich dir cedir vnd schenck.

Venus, An das sämptliche Hochlöbliche Frawenzimmer.

JCh scheid die seel vom leib/ vnd niemand doch vmbbringe. Jn andern/ der in sich todt/ Jch zu leben zwinge. Jn die verliebt Person Jch transformire bald/ Den der sich hat verliebt/ durch mein hohe gewalt.

O jhr Schönheiten groß/ wenn mans recht wil erwegen/ Durch Euch allein ich diß muß bringen all zu wegen. Ewr äuglein helle blick/ vhrkund ich vnd bekenn/ Vrsachen/ daß mein Fewr mehr entzünd vnd mehr brenn.

Man schreit über mein Kind/ vnd thut es sehr beschulden/
10 Daß jhm muß jederman seyn vnterthan vnd hulden.
Den Bogen hat er wol. Aber in grosser eyl
Hat der geblendte Knab nicht finden kont sein Pfeil.

Mein Sohn sucht sie im grimm/ vnd thut dem heftig trawen²⁶/
Der sie Jhm hat entfrembdt: Hüt euch/ jhr schöne Frawen/
5 Wolt jhr von meinem Sohn gestraffet werden nicht/
So blickt nicht so hervor/ vnd deckt ewr Angesicht. [36]